

6.2. Bearta an Phlean do Limistéar Pleanála Teanga Chiarraí Thiar (LPTCT) trasna na Réimsí Pleanála Teanga

Mar thoradh ar mhórán cruinnithe agus agallamh le páirtithe leasmhara trasna na réimsí éagsúla forbartha pobail agus teanga go mbíonn baint ag an bpobal leo in Iarthar agus in Oirthear Dhuibhneach, bailíodh 55 beart a chuimsíonn bearta Phlean Teanga Limistéar Chiarraí Thiar. Tá próiseas den tsórt céanna tosnaíthe i mBaile an Daingin le déanaí agus as san eascróidh Plean Teanga Bhaile an Daingin (Baile Seirbhíse na Gaeltachta). Beidh comhoibriú idir foireann feidhmithe an dá phlean chun comhtháiteacht na pleanála teanga sa Limistéar trí chéile a chinntiú. Baineann na bearta le gníomhaíochtaí trasna na réimsí pleanála teanga a thacóidh le príomhspríoc na Gaeltachta – **cosaint agus gréasán a chothú do na cainteoirí dúchais/laethúla Gaelainne agus an pobal a láidriú trí líon na gcainteoirí laethúla Gaelainne sa phobal a ardach.**


Na Réimsí:

Tá sé aitheanta ar bhonn idirnáisiúnta maidir le teangacha atá i mbaol gurb í réimse an teaghlaigh an réimse is tábhachtaí chun an teanga a sheachadadh nó a thabhairt ar aghaidh go dtí an chéad ghlúin eile. Nádúrthacht na Gaelainne mar theanga an teaghlaigh ag baile bunchloch an phobail teanga, ní féidir an pobal a thógaint gan an bhunchloch seo (Fishman, 1991). Ní leor an bhunchloch seo leis féin, áfach, chun an teanga a shábháil, is gá mórán réimsí tacaíochtaí eile. Tar éis réimse an teaghlaigh, is é an córas oideachais (réamhscolaíocht, bunscolaíocht agus iarbhunscolaíocht) an réimse is criticiúla chun tacú le pobal a dteanga a chosaint. Tá na réimsí **ar fad** atá tábhachtach chun tacú le pobal na Gaeltachta cosaint a thabhairt don dteanga áirithe sa liosta seo a leanas:

- Seirbhísí Tacaíochta Teaghlaigh/Teanga agus Seirbhísí Cúram Leanáí
- An Córas Oideachais (lena n-áirítear seirbhísí luathoideachais/réamhscolaíochta)
- Deiseanna Foghlama lasmuigh den chóras oideachais
- Seirbhísí don Aos Óg agus Aoisghrupaí eile (m.sh. Aosaigh an Phobail)
- An Earnáil Gnó, Forbairtí Geilleagracha & Tionsclaíocha agus Turasóireacht Chultúrtha
- Eagraíochtaí Pobail agus Comharchumainn
- Na Meáin Chumarsáide
- Seirbhísí Pobail (m.sh. Seirbhísí ó Eagraíochtaí Stáit agus Seirbhísí Eaglasta)
- Pleanáil agus Forbairt Fhisiceach/ Rialtas Áitiúil
- Seirbhísí Sóisialta agus Caitheamh Aimsire

Deineann léaráid 6.1 iarracht na réimsí seo a léiriú mar struchtúr tacaíochta an phobail, go

gcaithfidh bearta teanga a bheith i bhfeidhm trasna na réimsí seo chun an pobal Gaeltachta a chosaint (nó chun tigh láidir a thógaint). Gan bearta ag feidhmiú trasna na réimsí seo, ní bhíonn struchtúr láidir pobal teanga i bhfeidhm.



Léaráid 6.1 Na Réimsí Pleanála Teanga – léirithe i bhFoirm Tí

Nod: Nóta

Tá roinnt mhaith tagairtí sna bearta a leanas do na feidhmeannaigh éagsúla a bheidh ag teastáil chun an plean seo a chur i bhfeidhm. Tugann Mír 9 cur síos iomlán ar fheidhmiú an phlean agus an struchtúr atá á mholadh chun plean teanga Limistéar Pleanála Teanga Chiarraí Thiar a chur i gcrích. Is iad seo a leanas na feidhmeannaigh a luaitear sna bearta thíos (ó 6.3 go 6.12) a bheidh le fostú in Aonad Pleanála Teanga Chiarraí Thiar (APTCT) chun an obair thábhachtach seo a dhéanamh.

- Stiúrthóir an Aonaid (Post 1)
- Comhordaitheoir Teaghlaigh/larscoile an Ionaid Tacaíochta Teaghlaigh & an Aonaid (Post 2)
- Feidhmeannach Oideachais an Aonaid (Post 3)
- Oifigeach Óige an Aonaid (Post 4)

- Feidhmeannach Aosoideachais/Forbróir Cúrsaí (Post 5)
- Feidhmeannach Gnó & Turasóireachta (Post 6)

Tugann an tábla seo a leanas liosta de na ciorrúcháin atá in úsáid go rialta le linn na mbearta ó 6.3 go 6.12 thíos.

ITT	Ionad Tacaíochta Teaghlaigh (foirgneamh lonnaithe sa Iárionad Gaeilge agus Gaeltachta, Baile an Fheirtéaraigh)
LPT	Limistéar Pleanála Teanga
LPTCT	Limistéar Pleanála Teanga Chiarraí Thiar
OCD	Oidhreacht Chorca Dhuibhne
CFCD	Comharchumann Forbartha Chorca Dhuibhne
FSS	Feidhmeannacht na Seirbhísí Sláinte
APTCT (le bunú)	Aonad Pleanála Teanga Chiarraí Thiar
CNNG	Comhar na Naíonraí Gaeltachta
ROS	Roinn Oideachais agus Scileanna
COGG	An Chomhairle um Oideachas Gaeltachta agus Gaelscolaíochta
POG	Polasaí don Oideachas Gaeltachta
BOOC	Bord Oideachais agus Oiliúna Chiarraí
COC	Coláiste na hOllscoile, Corcaigh
CCC	Comhairle Contae Chiarraí
PT LPTCT	Plean Teanga Limistéar Pleanála Teanga Chiarraí Thiar